



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Tatu – Tarehe 11 Mei, 2018.

Kikao Kitaanza Saa 3.00 (Tatu) Asubuhi
na Dua itasomwa.

I. HATI ZA KUWASILISHA MEZANI:

Waziri wa Nchi, Ofisi ya Rais na Mwenyekiti wa Baraza la Mapinduzi:

Hotuba ya Makadirio ya Mapato na Matumizi ya Ofisi ya Rais na Mwenyekiti wa Baraza la Mapinduzi kwa Mwaka 2018/2019.

Mwenyekiti wa Kamati ya Kusimamia Ofisi za Viongozi Wakuu wa Kitaifa:

Hotuba ya Maoni ya Kamati ya Kusimamia Ofisi za Viongozi Wakuu wa Kitaifa kuhusu Makadirio ya Mapato na Matumizi ya Ofisi ya Rais na Mwenyekiti wa Baraza la Mapinduzi kwa Mwaka 2018/2019.

II. MASWALI:

Ofisi ya Makamu wa Pili wa Rais:

125. MHESHIMIWA SULEIMAN SARAHAN SAID (Jimbo la Chake Chake) – Atamuuliza Mheshimiwa Waziri wa Nchi, Ofisi ya Makamu wa Pili wa Rais:

Pamoja na jitihada za Serikali ya Mapinduzi ya Zanzibar katika kuwasaidia wananchi wake pale yanapotokea maafa kama mvua kubwa na kuporomoka kwa milima, lakini maafa haya ya mvua yamekuwa yakijirudia kila ikifika msimu wa mvua kwa sababu ama za watu kujenga katika njia za maji au miundombinu ya maji kushindwa kutoa maji kwa kasi.

- (a) Je, Serikali imechukua hatua gani kwa wale wananchi waliojenga katika njia za maji.
- (b) Je, yapo maeneo yaliyotengwa au kujengwa kwa ajili ya waathirika wa maafa ya mvua.
- (c) Je, Serikali imeshaweka vifaa na fedha za dharura kwa ajili ya kuyahami maafa hayo yasilete usumbufu na kusababisha maafa mengine.

Ofisi ya Rais, Tawala za Mikoa, Serikali za Mitaa na Idara Maalum za SMZ:

43. MHESHIMIWA ALI KHAMIS BAKAR (Jimbo la Tumbe) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Naipongeza Serikali ya Mapinduzi ya Zanzibar kutekeleza Ilani ya Chama cha Mapinduzi kwa kujenga Kituo cha Afya kwa wananchi wa Kojani Kisiwani Pemba ili kuwapunguzia kutembea masafa marefu kufuatia huduma ya afya. Hata hivyo, kituo cha Afya Kojani kinakabiliwa na ukosefu mkubwa wa vifaa na madaktari.

- (a) Je, ni lini Wizara itakipatia Kituo cha Afya Kojani Darubini (Microscope) kwa ajili ya uchunguzi wa wagonjwa mbali mbali.

- (b) Je, Wizara ina mpango gani wa kupeleka daktari wa meno atakayehusika na matibabu ya meno katika kituo hicho ili kuondoa tatizo liliopo.

Wizara ya Kazi, Uwezeshaji, Wazee, Wanawake na Watoto:

34. MHESHIMIWA SAADA RAMADHAN MWENDWA (Nafasi za Wanawake) - Atamuuliza Mheshimiwa Waziri wa Kazi, Uwezeshaji, Wazee, Wanawake na Watoto:

Mhe. Rais wa awamu ya kwanza ya Serikali ya Mapinduzi Zanzibar Marehemu Mzee Abeid Amani Karume alianzisha nyumba ya kulelea watoto waliokuwa wakiishi katika mazingira magumu huko Forodhani, hadi miaka ya karibuni watoto hao walipojengewa nyumba mpya na ya kisasa katika eneo la Mazizini. Pamoja na hatua hiyo nzuri ya Serikali, kumekuwa na malalamiko kutoka kwa wananchi kwamba baadhi ya vyumba vya nyumba hiyo hufungwa hivyo kusababisha usumbufu kwa watoto hao.

- (a) Kwa kuwa wananchi wengi walifurahia watoto hao kupelekwa katika nyumba hiyo, Serikali ina kauli gani kutokana na madai hayo.
- (b) Ni watoto wangapi wanaoishi katika nyumba hiyo katika kipindi hiki.
- (c) Je, watoto wanaoishi katika nyumba hiyo wanaruhusiwa kuishi humo hadi wafikishe umri wa miaka mingapi.

Wizara ya Biashara na Viwanda:

188. MHESHIMIWA ASHA ABDALLA MUSSA (Jimbo la Kiwengwa) - Atamuuliza Mheshimiwa Waziri wa Biashara na Viwanda:

Katika kulinda ubora wa karafuu, Shirika la Biashara la Taifa Zanzibar (ZSTC) limenunua mashine za kupimia kiwango cha unyevu wa karafuu.

- (a) Je, ni mashine ngapi zimenunuliwa.

- (b) Je, kiasi gani cha fedha kilitumika katika ununuzi wa mashine hizo kila moja

Wizara ya Ardhi, Nyumba, Maji na Nishati:

131. MHESHIMIWA SULEIMAN SARAHAN SAID (Jimbo la Chake Chake) – Atamuuliza Mheshimiwa Waziri wa Ardhi, Nyumba, Maji na Nishati:

Serikali ya Mapinduzi ya Zanzibar inastahiki pongezi katika kuendeleza jitihada za kuleta huduma za maji na kutoa ruhusa ya kuchimba visima kwa watu binafsi katika majimbo yao.

- (a) Je, kuna utaratibu gani unaotumika mpaka mtu akapata kibali cha kuchimba kisima au kila mtu anachimba tu.
- (b) Ni umbali gani unaohitajika kuwepo baina ya kisima kinachochimbwa na shimo la choo.
- (c) Je, maji yanayotoka katika visima hivyo yanakaguliwa kabla ya kutumika.

Wizara ya Afya:

278. MHESHIMIWA RASHID MAKAME SHAMSI (Jimbo la Magomeni) – Atamuuliza Mheshimiwa Waziri wa Afya:

Pamoja na juhudi kubwa zinazochukuliwa na Mhe. Rais wa Zanzibar na Mwenyekiti wa Baraza la Mapinduzi kupitia Wizara ya Afya katika kuimarisha huduma za afya hususan katika kupunguza tatizo la upatikanaji wa dawa katika hospitali zetu, bado kuna malalamiko kuwa wapo baadhi ya wafanyakazi wasio waaminifu wanaiba na kuziua dawa za Serikali katika maduka binafsi ya dawa.

- (a) Je, jambo hili lina ukweli na uzito wa kiasi gani.
- (b) Je, kama ni kweli, huoni kuwa tatizo hili linarejesha nyuma juhudi za Serikali sambamba na kupunguza imani ya wananchi kwa Serikali yao.
- (c) Je, ni juhudi gani Wizara inachukuwa kuona tatizo hilo linaondolewa na wahusika kuchukuliwa hatua zinazostahiki.

Wizara ya Ujenzi, Mawasiliano na Usafirishaji:

60. MHESHIMIWA SAID OMAR SAID (Jimbo la Wingwi) -
Atamuuliza Waziri wa Ujenzi, Mawasiliano na Usafirishaji:

Kwa kuwa baadhi ya maeneo hayajafikiwa na huduma za usafiri wa daladala kutokana na kukosekana kwa miundombinu ya barabara hususan maeneo yaliyo kando na miji yetu, na kupelekea usumbufu mkubwa wa usafiri kwenda na kurudi muafaka katika shughuli zao za kimaendeleo.

Je, Serikali ina mpango gani wa kusajili usafiri wa pikipiki (bodaboda) katika maeneo hayo ili ziweze kuwahudumia wananchi.

89. MHESHIMIWA BAHATI KHAMIS KOMBO (Jimbo la Chambani) – Atamuuliza Mheshimiwa Waziri wa Ujenzi, Mawasiliano na Usafirishaji.

Serikali ya Mapinduzi Zanzibar inawasaidia wananchi kuleta maendeleo nchini. Aidha Wawakilishi katika kusimamia vyema Ilani ya Chama cha Mapinduzi husaidia kutengeneza miundombinu ya maji na barabara. Hata hivyo, miundombinu hiyo haifikii kiwango kutokana na uwezo mdogo wa kifedha katika utekelezaji wa kazi hizo.

Je, Wizara itawasaidia vipi wananchi wa Kutukuu - Wambaa ili waweze kuondokana na tatizo hilo.

Wizara ya Kilimo, Maliasili, Mifugo na Uvuvi:

86. MHESHIMIWA OMAR SEIF ABEID (Jimbo la Konde) -
Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa wafanyakazi wa mashamba ya mipira kwa upande wa Pemba hawaendelei kugema kutokana na matatizo ya mishahara yao tatizo ambalo limekuwa likijirudia rudia kila mara kati ya wafanyakazi na kampuni zinazopewa au kukodishwa mashamba hayo.

- (a) Je, nini hasa tatizo la msingi linalosababisha wafanyakazi wa mashamba ya mipira kutolipwa mishahara yao kwa wakati.

- (b) Je, Kampuni iliyopewa au iliyokodishwa mashamba inamilikiwa na nani.
- (c) Je, ili kuhakikisha kwamba mashamba ya mpira yanatoa mazao kama ilivyokusudiwa, Serikali ina mkakati gani kwa Kampuni zinazokodi mashamba hayo kuweza kuyaboresha ili yaweze kuzalisha zaidi kinyume na hivi sasa.

III. HOJA ZA SERIKALI:

Waziri wa Nchi, Ofisi ya Rais na Mwenyekiti wa Baraza la Mapinduzi:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Ofisi ya Rais na Mwenyekiti wa Baraza la Mapinduzi kwa mwaka 2018/2019.

Zanzibar,
11 Mei, 2018.

(Raya Issa Msellem)
KATIBU WA BARAZA.